



Publicaziuns officialas dils 05-10-2018

Damondas da baghegiar

Nr. 97/2018

Datum da publicaziun: 05-10-2018
Patrun: Bass Silvio, 7166 Trun
Liug e parcella: Via Sursilvana; 1525
Object: nova porta per la garascha

Nr. 98/2018

Datum da publicaziun: 05-10-2018
Patrun: Orlik Anton, 7175 Sumvitg
Liug e parcella: Plaun da Crusch; 4929
Object: nova scala e niev mir da sustegn

Il profils ein tschentai ed ils plans da construcziun ein deponi tier la canzlia communal.
L'investa publica cuozza 20 dis dapi il datum da publicaziun.

Eventualas protestas encunter sura damonda da baghegiar ein d'inoltrar alla cumissiun da baghegiar Sumvitg enteifer 20 dis dapi il datum da publicaziun.

Annunzias da baghegiar

All'istanza da baghegiar ei sin fundament dil art. 40 dall'ordinaziun davart la planisaziun dil territori dil cantun Grischun (OPTGR) vegniu annunziau suandonts projects:

Nr. 91/2018

Juliana Alig-Lombriser, 7206 Igis; modificaziun da terren davos il baghetg nr. 538-A e remplazzament d'ina finiastra e digl esch balcun dil baghetg nr. 538 sin parcella nr. 182 a Rabius-Runs.

Nr. 94/2018

Vitus Caviezel, 7176 Cumpadials; remplazzament da finiastras dil baghetg nr. 171 sin parcella nr. 4064 a Cumpadials-Cantun.

Nr. 95/2018

Regula Dahinden e Stefanie Schöppe, 6005 Lucerna; montar sauna el tschaler dil baghetg nr. 310A sin parcella nr. 1458 a Surrein-Reits.

Nr. 96/2018

Armin Cabalzar, 7175 Sumvitg; sanaziun dil plaz sin parcella nr. 1896 a Sumvitg-Siltginas.

Exposiziun publica dalla repartiziun dils cuosts dalla sanaziun dalla Via Reits a Surrein

Sebasond sin art. 9 dalla lescha da perimeter ha la suprastanza communal disponiu la repartiziun dils cuosts en connex cun suranumnau perimeter.

La repartiziun dils cuosts vegn cheutras exponida publicamein naven dils 5 d'october 2018 duront 30 dis. Dils acts d'exposiziun sa vegnir priu investa sin canzlia communal duront las uras da spurtegl. A mintga pertuccau dalla procedura ei la repartiziun da cuosts vegnida communicada a scret.

Encunter sura repartiziun da cuosts sa vegnir protestau en scret e motivau enteifer il temps d'exposiziun tier la suprastanza communal.

Sumvitg, 05-10-2018

Suprastanza communal

Curdem da gronda dimensiun

La vischnaunca organisescha ina rimnada da rufid bloccont sco suonda:

Venderdis, ils 19 d'october 2018 dallas 08.00 - 18.00 uras

Ei vegn rimnau il rufid per l'entira vischnaunca sin la piazza Igniu (spel baghetg economic)

Ils curdems ein da deponer els containers ni navettas tschentai sil plaz. Per tener-casa vegn priu encunter **max. 2 m³** rumians. Quantitads pli grondas, per ex. ord rumidas da casas e clavaus ein da transportar directamein e sin cuost dil caschunader ella deponia regionala a Rueun. Rumians jamnils, q.v.d. rumians ch'ins dismetta el sac verd e rufid bloccont pign (dimensiuns max. 100 cm liung / 60 cm lad / 60 cm ault / peisa max. 30 kg) vegnan buca pri encunter. Tals rumians ein da plazzar als plazs da rimnada usitai els vitgs e che vegnan rimnai entras la Regiun Surselva mintgamai la mesjamna.

Ei vegn acceptau

- maschinas pintgas e mopeds mo cun tratg giu ieli e benzin,
- ferramenta, ferradira da tuttas sorts (meisas da fier, uaffens da fier, velos, e.a.v.),
- tut las maschinas electronicas (computers, frestgeras, maschinas da furar, pegnas d'electriche cun e senza ieli e.a.v.),
- mobilier movibel (letg, scaffa, suppia, madrazza, teppi denton buca culau giu, e.a.v.),
- requisits per il temps liber e sport (skis, indrez da trenament, velos e.a.v.) ch'ei pli gronds che 100 cm liung / 60 cm lad / 60 cm ault ni pli grevs che 30 kg,
- per pneus senza gavegl vegn incassau ina taxa da frs. 5.--, cun gavegl frs. 10.--,
- per pneus da maschinas agricolas pintgas vegn incassau ina taxa da frs. 20.-- e per pneus da tracturs frs. 50.--,
- calzars da skis san vegnir dai giu en favur dalla ARGO Tavau per frs. 5.--.

Buca acceptau vegnan

- tuttas maschinas agricolas,
- lenna da brisch, lenna veglia, lenna da baghetg (tabliaus, plantschius, lattas, quaders, panos, e.a.v.),
- sacs da pupi e da plastic,
- materials da pachetar (palets, stiropor, plastic, e.a.v.),
- requisits per il temps liber e sport ch'ei pli pigns che 100 cm liung / 60 cm lad / 60 cm ault e pli levs che 30 kg (bob, scarsola, calzars da rodas, aissa-rulletta e.a.v.),
- blachas da ballas da silo (verdas ed alvas),
- curdems da baghetg (linoleums, isolaziuns, plastics, folias da tetg e da preits, e.a.v.) e curdems da fatschentas,
- curdem verd da curtin e caglias, tals curdems san vegnir transportai sin la deponia verda ad Igniu,
- cartun e pupi duei vegnir surdau alla rimnada entras la scolars resp. las uniuns.

Ils suandonts rumians vegnan rimnai cun ils rumians jamnills e basegnan las marcas sco suonda:

- sacs tochen 50 kg; 1 marca da frs. 2.50,
- rumians pigns tochen 100 cm liung / 60 cm lad / 60 cm ault e pli levs che 12 kg; 2 marcas da frs. 2.50,
- rumians pigns tochen 100 cm liung / 60 cm lad / 60 cm ault entochen ina peisa da 30 kg; 3 marcas da frs. 2.50.

Nus appelein alla responsabladad da vischinas e vischins e supplichein da setener vid quellas directivas en favur digl ambient. Medemamein fagein nus attents da buca deponer rumians sin deponias illegalas (selvadias). Talas deponias cunterfan alla legislaziun per la dismessa da rumians e vegnan annunziadas als organs responsabels e puni.

Per ulteriuras informaziuns stat il gerau responsabel bugen a Vossa disposiziun.

Sumvitg, 05-10-2018

Departament d'ambient

Serrada via d'uual Crap Ner

Muort lavurs vid in tagl da lenna ei la via d'uual Crap Ner serrada denter Salvaplauna e Crest ault per tut il traffic naven da gievgia, ils **4 d'october entochen venderdis, ils 12 d'october 2018**. La via resta serrada sur notg e duront la fin d'jamna. A pei e cun velo eis ei pusseivel da passar atras. Nus engraziein per Vossa capientscha.

Tier damondas stat il selvicultur da revier bugen a disposiziun (081 920 25 06 ni 079 681 19 67).

Sumvitg, 05-10-2018

Uffeci forestal Sumvitg

Preparaziun sin temps d'unviern

Tenor art. 69 dalla lescha da baghegiar ei la vischnaunca autorisada da schar dismetter la neiv dils implonts publics d'avertura sil schischom privat cunfinont cun prender il duiv risguard sin baghetgs, implonts e cultiras. Per liung dallas vias publicas e privatas ein seivs demontablas ni implonts da tal gener d'allontanar. Ultra da quei ston caglias e roma vegnir tagliadas anavos aschia che la rumida da neiv vegn buca impedida.

Quellas lavurs da preparaziun sil temps d'unviern ston vegnir exequidas entochen alla fin d'october 2018. En cass d'omissiun refusescha la vischnaunca suenter la sesiun d'unviern scadins donns occuri ord la rumida da neiv.

Sumvitg, 05-10-2018

Departament traffic

Rumida da neiv 2018/2019

La vischnaunca exequescha era uonn puspei sin incarica la rumida da neiv per privats. L'indemnisaziun per quella lavur corrispunda allas cundiziuns che l'industria privata pretenda. Plinavon sto quella dismessa da neiv star anavos en prioritad alla rumida dils implonts publics d'avertura. Sche pusseivel duei l'incarica vegnir surdada alla vischnaunca mo leu nua che quella procura era la dismessa dallas vias cunfinontas. Vischinas e vischins che vulan schar exequir la vischnaunca la rumida da neiv da lur vias e parcadis privats duront gl'unviern proxim ein supplicai d'annunziar quei a scret ni per telefon entochen ils **31 d'october 2018** al cau dil menaschi stradal (tel. 079 638 18 19).

Sumvitg, 05-10-2018

Departament traffic

Sera da divertiment Cun Viktor Giacobbo e Martin Candinas

Venderdis, ils 12 d'october 2018, allas 20.15 ella sala dil «Hotel Greina» a Rabius.

Moderaziun: Valentin Schmed

Entrada: Collecta en favur dalla sanaziun dalla piazza da giug a Rabius-Igriu

Organisaziun: Cummissiun da cultura Sumvitg

Horror night Cumpadials

A caschun dalla Horror night arvin nus la bar gia venderdis, ils 12 d'october naven dallas 19.00 pils convischins ed amitgs da Cumpadials e da nossa vischnaunca. Nus selegrein sin Vossa viseta! *Uniun da cultura e sport Cumpadials*

Menu dalla tatta:

cun spisas tradiziunalas / mit althergebrachten Gerichten:

Sonda, ils 13 d'october 2018

Ustria Val, Val Sumvitg

Sonda, ils 27 d'october 2018

Hotel Greina, Rabius

Reservaziuns directamein ell'ustria giavischada.

Bien appetit giavischa, *Sumvitg Turissem*

Cuminonza pro S. Benedetg, Clavadi e contuorn

Invitaziun alla 14. radunonza generala ils 6 d'october 2018 allas 20.00 ell'ustria «Miraval», S. Benedetg

Tractandas

1. beneventaziun/appel
 2. elecziun dils dumbravuschs
 3. protocoll e lur approbaziun
 4. rapport annual dil president
 5. rapport dils cuitgs
 6. rapport dalla cassa, dils revisurs/approbaziun
 7. budget 2018–2019
 8. program da lavur 2019
 9. propostas dils/dallas commembras/-ers
 10. varia
- Plaid final dil president
Star si legher ensemen tier revista da dias
Sin stedia participaziun selegra *la suprastonza*

Meisa da miezdi (gentar communabel) dalla Pro Senectute a Cumpadials

La Pro Senectute Surselva organisescha ensemen cun Nadja Scolieri ell'«Ustria dalla staziun» a Cumpadials ina meisa da miezdi (gentar communabel) inagada per meins, mintgamai il venderdis. Intent dalla meisa da miezdi duei esser da promover la cuminonza ella vischnaunca da Sumvitg e contuorn denter las persunas ella vegliadetgna dalla pensiun. Plinavon dat ei la pusseivladad d'embellir quella occasiun cun star suentermiezdi da cumpignia e dar in scart troccas ni auters giugs.

Liug: «Ustria dalla staziun», 7176 Cumpadials

Datum: **venderdis, ils 12 d'october 2018 allas 12.00**

Annunzias: Ein da far entochen mesjamna sera tier «Ustria dalla staziun», Cumpadials

Tel. 081 943 19 22

Engraziel fetg e cordials salids *Pro Senectute Grischun*